



Banerjee-i mepetmesü adoker aliba tesem semdang

Germany chancellor inyaktsü Friedrich Merz shimogo



Tizit nung 'night curfew' benoker

Dimapur, May 6, 2025 (TYO): Tizit jila aser temeket nung tensa mejungi akümtsü ama ajitetba agi ketdangsürtemi night curfew ozüing benokogo.

Tizit-Namtola apu nungi Tekang lenjem tashi aonung 6:00 ako nungi anepdang 6:00 ako tashi night curfew alitsü.

Tensa mejungi akümtsü akok ta osangtem angazükba sülen Tizit Sub-Division Additional District Magistrate, Relise Sangtam, NCS-i iba tetuyuba agütsüogo.

"Nisungtem adenshiba aser ajungmesoba ajanga tensa

tamajungba akümtsü akok. Public tiptema ayutsü atema ibala maparen azüoktsüla" ta pai sangdong ka nung ashi.

Iba night curfew kübok nisung pungu mesüra tali adenshitsü memelar. Iba tesem nung süng/yintem/nok (daos) mesüra lung bener senzüba noktanger.

Iba tetuyuba alema inyaktertem dak ozüing tapet agi merenshitsü ta ketdangsürtemi ashi aser Tizit Sub-Divisional Police Officer (SDPO) nem curfew inyakyim ketdangsüa inyaktsü tetuyuba agütsüogo.

NPCC-i Dr. Neiphiu Rio aitsür

Dimapur, May 6, 2025 (TYO): High Powered Committee (HPC) indang Interim Report nung ajemdaker Assistant Professors 147 regularize asüba tetuyuba meyipa agi ta Chief Minister Dr. Neiphiu Rio-i Mokokchung semdangdang jembiba aitsür ta Nagaland Pradesh Congress Committee (NPCC)-i metetdaksü.

Tesüiba nung Nagaland Cabinet-i lemtet agisaa aruogo aser tang-a Chief Minister-i par Cabinet lemtet ya asayamenü ka

ama dang kümdaktsüogo, kechiyong Cabinet-i shimba committee ka kübok parnok jenbutsü meranger aser iba ya temeten bushirtem mezügmeshiba inyakyim ka lir ta Communications Department, NPCC-i metetdaksü.

Opposition maliba sorkar ka ketdangsüba ajanga Chief Minister-i pa sünütsü asütsü makok aser Cabinet sendentem nung zübazüba lemtettem magitsüla ta NPCC-isa ashi.

NHAK nungi osettem auyaba manener

Dimapur, May 6, 2025 (TYO): Naga Hospital Authority, Kohima aser temeket nung auertemi aiben osetsüset auya bener ogo ta ketdangsürtemi ashi.

Auertemi CT Scan machine nung grounding system den sendaktepba copper wires aiben auya bener ao aser tawa tu anaben tashi iba ya atalokogo ta Managing Director NHAK Dr M Margaret Yhome-i sangdong ka nung ashi.

Item tatalokba ajanga CT scan service tenzüka aotsü menur

aser public health service delivery nung timtem agütsür. Iba dak sendakba nung South Police Station, Kohima nung FIR ka benoka lir ta Managing Director-isa metetdaksüogo.

Nübertemi auertem maitsü jangjaba nung yariba osangtem agüja yariteptsüla mepishir. Nenoki amalitep aliba ajanga tarutsü nung ibalal tatalokba nungi jenbua litettsü aser healthcare infrastructure kümzüka yutettsü ta Dr. Margaret-isa mepishia metetdaksüogo.

India aser UK tsüingda Trade Pact nung sign sütepogo

New Delhi, May 6, 2025 (Agencies): India aser United Kingdom tsüingda Free Trade Agreement aser Double Contribution Convention nung sign sütepogo ta Prime Minister Narendra Modi-i tanü metetdaksü.

"Iba ya otsüsütsü aketba alizüing ka atongba lir. Iba ajanga linük anaprong tesentaktep akangshitsü aser shishilembaba, mapa adokba aser purapitetba nung teyari angutsü" ta PM Modi-i ashi.

PM Modi-i UK Prime Minister Keir Starmer den phone ajanga jembitep aser idangji India semdangsü pelashishia jaok.

Ozü sorkari linük balala den

tesentaktep akangshiteptsü aser shishilembaba tsütsü tenokdangba agientsü asoshi sentong lir ta PM Starmer-i ashi.

UK nung taoba Prime Minister Boris Johnson alidang nungi India aser UK tsüingda free trade agreement atema mapa inyaka aru.

Ajisüaka, India nunger nem visa agütsüba, garitem aser Scotch whiskey amala UK exports aser steel o fertiliser amala nung UK Carbon Border Adjustment Mechanism (CABM) onüktem reprangshimtsü atema ketdangsürtemi mapang talila agia liasü.

Nagaland nunga tanü Mock Drill agitsü

Dimapur, May 6, 2025 (TYO): Ministry of Home Affairs (MHA)-i tuyuba ama Nagaland sorkari Civil Defence Exercise and Rehearsal ayongzüka agitsü telemtetba ka agiogo.

Iba sentong ya May 7, 2025 nü operation code name "Operation Abhyaas" kübok district 10- Dimapur, Kohima, Mokokchung, Wokha, Zunheboto, Mon, Phek, Tuensang, Kiphiri aser Peren nung agitsü.

May 7, 2025 nikongdang 4:00

ako nung Mock Drill exercise agitsü anungji sensotem maoksatsü metetdaksür ta sorkar sangdong ka nung ashi.

Civil Defence Exercise nung District Controller, district authority civil defence wardens/ volunteers, Home Guard (active/ reservists volunteers), NCC, NSS, NYKS Colleges/Schools, kaketshirtemi shilem agitsü ta parnokisa ashi.

Iba anogo bangdak department temi tsüinglanglen agüja aliba Modus Operandi

agitsü:

(1) *Simulation: - Incoming Air Raids, Activation of Sirens and Blackout Measures.*

(2) *Scenario: - Fire in the building, Search and Rescue, Casualty evacuation from the damaged building from Air Offence, Temporary hospital setting, and Evacuation of civilians from endangered areas to bunkers/demilitarised zones.*

(3) *Hourly reporting from State War Room to DGCD Control Room MHA, New Delhi.*

RSS-i 'Chalo Manipur' sentong ayongba aitsür: KIM

Imphal, May 6, 2025 (Agencies): Kuki Inpi Manipur (KIM)-i 'Chalo Manipur' campaign aitsüogo aser iba ya kin o kin tsüingda mepetmesü tali adokdaksütsüba sentong ka lir ta ashi.

Rashtrahit Sarvopari Sangathan (RSS) aser parnok den sendaktepa aliba teloktemi pei talidak toktür aoertem tanaben anir aotsü tenüing amer Kuki nunger aliba tesem ajunga nung arua alitsü meranger ta KIM-i Mongulbarnü metetdaksü.

Rashtrahit Sarvopari Sangathan (RSS) aser parnok den sendaktepa aliba teloktemi New Delhi nungi tenzüker Manipur nung Kuki nunger aliba tesemtem tashi jajatsü sentong ka agitsü ayongzükogo.

Pei talidak toktür aoba Meitei nunger nem talidak agütsütsü ta

tenüing amer parnoki iba sentong ayongzüker.

"Iba ya yimjung mapa ka masü. Iba ya Kuki nunger alemli nungi lia aruba tesemtemi tashiyim agi arua alitsü merangba mapa ka lir aser kin o kin tsüingda mepetmesü tali adokdaksütsü" ta KIM Information & Publicity Secretary Janghaolun Haokip-i ashi.

'Chalo Manipur' campaign ajanga Manipur nung lokti nung telemsa adoka aliba tuluba kümdaktsütsü. Chief Minister N. Biren Singh lenisüba kübok state sorkari ibala inyakyim mengui dang yutsü, ta parnokisa ashi.

"Iba sentong ya rehabilitation den kecha sendaktepa mali saka yimtenren tsütsü tashi angutsü atema dang lir. Sorkari teyari agüja Kuki nunger atsüngdoktsü merangba mapa nung iba ya

shilem ka lir" ta KIM-isa ashi.

India sorkar aser central security forces-i sentong magidaktsüi noktangtsüla. Iba sentong agiba ajanga ozüing alema inyaksangshiba mesüra teraksa kar danga atalokra Centre aser state sorkartemi iba tebilemtsü khuretji abentsü ta parnokisa kümdangtsü olen ka ashi.

KIM-isa international human rights organizations aser national media dang item maparen nung tenük yoktsü mepishia metetdaksüogo.

"Kuki nungeri aremzüka ya tashi angaba ama mezüngshitsüla. Manipur kübok tenem district tem ya political laboratories masü aser yimjung tenüing amer kin ka samatsütsü merangba onoki memelatsü" ta KIM-isa ashi.

NE nung category II & III kübok defence drill agitsü



Guwahati, May 6, 2025 (Agencies): Centre sorkari May 7 nü linük ajungalen civic defence mock drill agitsü sangdongba nung Northeastern state tem adentsü.

April 22 nü Jammu and Kashmir kübok Pahalgam nung kiralongrartemi nisung 26 tepsetba sülen India aser Pakistan tsüingda tesentaktep mejungi kümer aliba mapang ka iba mock drill agitsü telemtetba agiogo.

May 7, 2025 nü telemsa asem yur tesem 259 nung mock drill alitsü. Iba nung Northeastern

state tem category II aser III nung adener.

Arunachal Pradesh

Category II - Aalo (West Siang), Itanagar, Tawang, Hayuliang

Category III - Bomdila

Assam

Category II - Bongaigaon, Dibrugarh, Dhubri, Goalpara, Jorhat, Sivasagar, Tinsukia, Tezpur, Digboi, Duliajan, Guwahati (Dispur), Rangia, Namrup, Nazira, North-Lakhimpur, Numaligarh

Category III - Darrang, Golaghat, Karbi Anglong,

Kokrajhar

Manipur

Category II - Imphal, Churachandpur, Ukhrul, Moreh, Ningthoukhong

Meghalaya

Category II - Shillong, Jowai, Tura

Mizoram

Category II - Aizawl

Nagaland

Category II - Dimapur, Kohima, Mokokchung, Mon, Phek, Tuensang, Wokha, Zunheboto, Kiphire, Peren

Sikkim

Category II - Gangtok

Tripura

Category II - Agartala

Rajasthan, Punjab, Jammu & Kashmir, West Bengal, aser North East amala arrtsü anasa aliba state tem dang multi-hazard scenarios nung ajemdaker drill agitsü tetuyuba agütsüogo.

May 7, 2025 nü civilian temi mock drills nung shilem agidang India kübok tesem balala nung air raid sirens asatsü.

HSLC/HSSLC nung takok angur DEF Kohima police chirtem tushiba sentong agi



Dimapur, Monupii/May 06 (TYO): DEF Kohima Police personnel chirtem tawa sangdongba HSLC aser HSSLC examination 2025 nung takok angur kaketshir 97 nem tenüngsang agütsüba sentong ka SP Office Conference Hall, Kohima nung May 6, 2025 nü agia liasü.

Kaketshir temi meranga inyakba benjonga aser maneni academic tsütsü bendanga agütsür azüngtsü ajungmesoa aser parnoki takok anguba nung tsürabor aser police temi yaritepba tepela lemsateptsü nükjidadong nung iba sentong ya ayongzüük.

Takok angurtem rongnung

UBC Imlinungsang Ao'er jabaso aser Model Higher Secondary School, Kohima nung azünger Takayuba Ao-i Commerce stream nung top 9 jenjang nguteta liasü. Pa nem senpet sen 10,000 agütsü aser tanünga kaketshir 96 shia nem tepela temaitsü sen 1,000 agüja liasü.

Iba sentong nung Addl. Superintendent of Police, Kohima menden liasü aser Teisovise Metha, IPS, Superintendent of Police, Kohima ajanga tayongzüükba o jembia liasü.

SP Kohima, Teisovise Metha-i sentong nung jembidang kaketshir temi tezü

medangi azüngba atema tenüngsang agütsü aser tarutsü wadang nunga kasa yimya nung azüngtsü aser inyaksü ajungshia liasü.

Lokti nung shilem tajung agütsü asoshi shisaliok ya tamendak dak lir ta pai ashi aser tarutsü nunga maneni takok angutsü imlar ta ashi.

Johnny M. Patton, Dy. SP (R), Kohima ajanga takum nung takok angutsü yimyatam nung ajemdaker mapang tatsüka agia jembia liasü.

Iba sentong tembanga Rev. Vesotsü Rhakho, Pastor PUBC ajanga sarasadem aser iba sülen süngo jema sensaksemba mapang agia liasü.

Mon Deputy Commissioner den tepila sentong agi

Dimapur, Monupii/May 06 (TYO): Mon indang Deputy Commissioner mapa yutsüsang Ajit Kumar Verma, IAS nem akhum agüja tepila sentong ka Town Council Hall, Mon nung May 6, 2025 nü agia liasü.

Outgoing DC Ajit Kumar Verma-i iba sentong nung tepila o jembidang, Mon district nung aliba HoDs, Administration staff, civil society balala, Police department aser nüburtemi pa kum asem jungnüa DC inyakdang yaritepba aser amalitepba atema pelaba lemsatepa liasü.

Police department medeni Administration-i Law & Order

shidak mamshitetsü, ta pai ashi aser pa mapang Mon district nung arua inyakba Superintendents of Police ajunga dang pelaba lemsatepa liasü.

Pai ketdangsür, HoDs aser civil society tem dang nüburt asoshi maneni inyaksü ayongzüük aser Mon ya temu aliba district ka lir, kong Education, Health aser Tourism sector nung nükla tajung lir ta ashi.

Iba sentong nung Deputy Commissioner tasenba Wennyei Konyak, NCS agizüka liasü. Pai DC tejenba nem tenüngsang agütsü aser mapa tasenba nung takok angutsü tamang akar ta ashi.

Ajit Kumar Verma ya Mokokchung district indang Deputy Commissioner inyaksü.

Sentong nung SDPO, Bendang Wati; President, Konyak Union, Tingtok Konyak; President, Konyak Nyupuh Sheko, Konyak Students' Union; Mon DPDB tenüng nung CMO, Mon, DC Staff Mon Headquarters tenüng nung Martha aser District Administration Mon tenüng nung Pakon Phom nungeri jembia liasü.

Iba sentong nung EAC, Er. R. Mhao Humtsoe menden liasü aser Yawang Konyak-i temeja ken ka aten.

Jalukie nung ango metsütsü training ka tenzüükogo



Dimapur, Monupii/May 06 (TYO): Akhi yimya melena scientific yimyatam amshia ango metsütsü aser giant freshwater prawn farming (Microbrachium rosenbergii) atema Peren District Level Farmers Training ka Rehangki Conference Hall, Jalukie nung May 6 & 7, 2025 anogo asoshi tenzüükogo.

Iba training ya Fish Farmers Interest Groups (FIG) Peren ajanga Department of Fisheries & Aquatic Resources den lungjemer Agriculture Technology Management Agency (ATMA), Peren ajanga

ayongzüka liasü.

Iba sentong nung shisalen sayur ya Kumar's Hatchery, Kolkata, West Bengal kibur Avijit Kumar Kolay liasü aser technical session mapang pai ango metsüba yimya balala lemsatepa liasü.

Ango junga metsütetstü asoshi tzü tajung, chiyongtsü shidak aser mürekmeju nüngdaker ta pai ashi.

Fish hatchery nungya ango indang entzü ayur aser ango tila asüadang yangji ayur ta pai ashi.

Iba training tenzüükba sentong nung District Fishery Officer & Project Director,

ATMA, C. Dory Yanthan-i tayongzüükba o tatsüka jembidang ango metsürtem dang iba training nungi mapang kanga kumdanga amshia ango metsütsü asoshi angazütsü ayongzüka liasü.

Laisa ango metsürtem dang market atema local ango tali metsütsü ajungshi aser iba training ya ATMA ajanga senotsü teyari agüja ayongzüba lir ta ashi.

Rev. Kuzierang Thou ajanga Tsüngrem temoatsü jazüka sarasadem aser Deputy Project Director, ATMA, Kumui Bring-i pela agizüka o jembia liasü.

Two-Wheeler Taxi Permit atema metetdaksür

Dimapur, Monupii/May 06 (TYO): Two-Wheeler Taxi Permit atema interview agütsü asoshi shimteta aliba candidate tem tenüng aser interview agütsü anogo tejangja Deputy Commissioner's Office, Dimapur indang Notice Board nung May 7, 2025 nü inoktsütsü,

ta Deputy Commissioner, Dimapur ajanga sangdong ka nung metetdaksüogo.

Anungji candidates ajungai pei temsüa aliba jangjar anogo latetja aliba mapang arua interview nung shilem agütsü metetdaksür, ta sangdong ajangasa ashi.

NHAK nung 3D Dental Laboratory amenokogo



Kohima, Monupii/May 06 (TYO): Naga Hospital Authority, Kohima (NHAK) nung 3D Dental Laboratory amenokogo, kong technology tasenba amshir aser state nung Dental application atemabo iba ama Laboratory ya mezüngbuba alitsü.

Iba Laboratory amenoktsü atema senotsü ya Ministry of DoNER (Development of North Eastern Region) indang PM-DevINE (Prime Minister's Development Initiative for North East Region) scheme nungi lir aser NEC (North Eastern Council) aser AMTRON (Assam Electronics

Development Corporation Ltd.) den teka amteper inyak, koba Commissioner & Secretary, Health & Family Welfare Department ajanga May 5, 2025 nü semzüjka liasü.

NHAK nung 3D Dental Laboratory amenoktsü atema March 19, 2024 nung AMTRON, Government of Assam undertaking aser NHAK tsüngta Memorandum of Understanding ka zülutepa liasü.

Managing Director NHAK DR M Margaret Yhome ajanga nüburtam dang Department of Dentistry, NHAK nungi iba technology teyari agütsü sangdongogo.

Lirmen nung tantsütila arishi küm 100 jungogo

Dimapur, Monupii/May 06 (TYO): Mokokchung district kübok Lirmen yimtsüng nung tantsütila, Lolenyangla arishi küm 100 ajungba t a s o b a anogomung May 5, 2025 nü mungogo.

Lolenyangla ya Asür Malemtetba Lemdur aser Asür Phutishila Walling na jala lir.

Lolenyangla asoba anogomung


nung sentong tongmelang ka lar kidang lar jala, semchir aser anük-apang temi ayongzüka liasü, kong Lirmen Baptist Arogo nung Pastor Rev. Marliba Pongen aser Associate Pastor (W) Süpongrenla Jamir nati anir arogopur arua moatsü.

La ya May 5, 1925 nung aso ta Lirmen Baptist Arogo nung record lir.

Lanuwa nungi Lolenyangla

ya Khristan tajung ka liasü aser asüngteta aliba takum ka lir. La arishi küm 100 jungaka anogoshi ki mapa lai shidak inyakteter. La tenük, tenarong aser tebo ajak junga lir aser tekolok shidak lir. Lai teti tekülem sentep nung adener.

La kinungbo ta M. Lanutemjen Jamir, shiba la dang küm ishika agi tanubo aser jala ka aser semchirtem moaja lir.



Banerjee-i mepetmesü adoker aliba tesem semdang



Murshidabad district nung metepmesü agi kongshir alirtem den West Bengal Chief Minister Mamata Banerjee-i sensaksemba noksa nung angur.

New Delhi, Monupii/May 6 (Agencies): West Bengal Chief Minister Mamata Banerjee-i, Mongolbarnü mepetmesü adoker aliba Murshidabad district semdanga taoba ita tamangba yimsü balala amangertem tsüngda mangatettep adokba agi kongshir aliba kibongtem semdanga liasü.

Banerjee-i iba district semdang tenzüker tananübuba Samserganj ya helicopter ka nung tonga ao aser local block development

office nung lendong agi kongshir aliba kibongtem den senden ka mena liasü.

Waqf Amendment Act anema longkak aitba mapang Murshidabad kübok Samserganj, Suti, aser Dhulian tesem nung azütokshi lendong atalokba sülen tang mezüngbuba chief minister-i iba tesem semdanga liasü.

Mepetmesü adokba mapang nisung asem asü aser nisung aika yirua liasü.

Banerjee-i, timtem agi

kongshir aliba kibongtem dang sorkari takokba tashi teyari agütsütsü nangzükba den azütokshi lendong adokdaksütsü rongmesortem anema jenjang tapet agitsü tenangzükba agütsüogo.

Chief minister-i Murshidabad semdanga mapang security kanga akanga tokja liasü.

Banerjee-i Hombarnü ashiba agi, shirnoki azütokshi lendong atalokdaksütsü atema rongsemoer parnok ya West Bengal tsükchir lir.

Gandhi-i Pahalgam nung asüba Navy officer ka kinunger semdang

New Delhi, Monupii/May 6 (Agencies): Lok Sabha nung Leader of Opposition aser Congress lenir Rahul Gandhi-i Mongolbarnü Navy officer Lt. Vinay Narwal'er kinungertem den ajurutepogo. Narwal ya tawa kiralongrartemi Jammu and Kashmir kübok Pahalgam amakba mapang tepseta liasü.

Gandhi meina Congress lenir tejen B K Hariprasad ao, shiba Haryana nung party inyakyim in charge lir. Haryana Congress tir Udai Bhan, Rohtak MP Deepender Singh Hooda, aser party lenir Divyanshu Budhiraja nungera oa liasü.

Asür nem aküm tetushi agütsüba sülen Gandhi-i par kidang ghonda ka ser tesadang mapang intoka par tsürapurtem den sensaksemba liasü.

Osangbenertem den sensaksemba mapang Hooda-i ashiba agi, Gandhi ya par kinungertem den asükhu lemsatepsü atema aru.

Iba sülen Gandhi-i X ajanga, "ni asükhu lemsatepsü atema

Lieutenant Vinay Narwal'er kinunger den ajurutepogo, shiba Pahalgam amakba mapang tepset. Mangyim jashi tia nung aliba mapanga parnok temulungtetba aser tasü aitba ajanga asenok longjemer alitsü nüngdakba linük ajunga dangi osang yoker," ta ashi.

"Asür kinungertem den linük ajunga nokdaka lir. Oppostion-i sorkar nongiter aser shingaia India dak tenük meyoktsüsa aibelenertem merenshitsüla," ta Gandhi-i ashi.

Haryana Chief Minister Nayab Saini kinungsü, Suman Saini-i Deobarnü 'Shraddhanjali Sabha' ka nung iba asür Navy officer nem aküm tetushi agüja liasü. 'Shraddhanjali Sabha' ya par kinungertemi Karnal nung par kidang yongzükba liasü.

Sentong nung shilem agiba sülen osangbenertem den sensaksemba mapang lai ashiba agi, "tanü ya tejashitsü anogo ka lir. Par kibong nung temeimba jabaso ka taküm samaogo aser ni parnok nem tashi agüjang ta tsüngrem dang sarasademtsür.

April 22 nü kiralongrartemi amakba ya aitsüba kija agi meperir. Linük ajungai pa asüba mang ayimer."

Taoba mapang Haryana Chief Minister Nayab Singh-i, Vinay Narwal'er kinunger nem sen lakh 50 aser sorkar mapa ka agütsütsü nangzükba liasü.

Narwal ya Karnal, Haryana nungi lir aser par kinungertemi taoba ita pa den asüpila sentong ka ayongzükba agiogo.

Narwal tebui sorkar dak tamang akaba lemsatepogo aser Union sorkari ochi obendang agütsütsü, ta ashiba den iba takoksa ya aremzüksü makoker aser melentsü makok ta ashi.

Vinay Narwal ya April 16 nüang kibong küma liasü. Asür Narwal, shiba Kochi nung mapa ata liasü, pa leave nung kinungsü den Pahalgam-i oer aliba mapang kiralongraratemi iba tesem maka liasü.

April 22 nü Jammu and Kashmir kübok Pahalgam tesem kiralongrartemi amakba sülen nisung 22 tepseta liasü.

Anti-Naxal Operation nung CRPF officer ka densema nisung 5 yiru

New Delhi, Monupii/May 6 (Agencies): Anti-Naxal operations talangtiba aser tulutiba nung CRPF ketdangsür ka den tangar pezü aser STF nungi personnel ana yiruogo.

CRPF sangdong ka ajanga ashiba agi, Assistant Commandant Sagar Borade ya May 4 nü Chhattisgarh-Telangana arrtsü nung anti-Naxal operation ka nung yirua liasü.

CRPF-isa, iba tesem nungi IED 112 ngutetogo. Iba tesem ya Naxal pur tamendakdak tashi taittem rongnung tatembangbuba ta züngshir.

Iba tesem nung Naxal lenir tongtibangtem aika sabang alitsü ta sepaitemi bilemer, ajisüaka lenirtem ya karbo Telangana len nungi jena or alitsü akok.

"Chhattisgarh-Telangana arrtsü len KGH Hills nung anti-Naxal operations ka benoka inyakba mapang CRPF Assistant Commandant Sagar Borade kanga mejungi yirua liasü. CRPF elite 204 CoBRA Battalion-i anir inyakba operation nung IED apokba mapang sepai ka yirua liasü. Assistant Commandant Borade shiba lenisüba nung

team inyaksangshia liasü, pai pa taküm atema kecha mebilemi iba yirur aliba sepai kümzüksü meranga liasü. KGH Hills ya sorkari aputsü bushiba Naxal lenirtem aika jenokba tesem ka ta amanger. Iba tesem nung arem kanga temelem aser iba den IED aika rema tokja lir," ta CRPF ketdangsür kati ashi.

Par team kümzüka toktsütsü atema kanga tasü ita jenjang agiba mapang Borade-i memeteni IED ka nung ajem aser iba ajanga pa tetsüng tabelen kanga mejungi yirua liasü. Iba sülen pa Raipur-i anir ao aser idak nungjiagi AIIMS Delhi-i anir ao, kong pa tetsüng tamajungba küma aotsü nungi kümzüka toktsütsü atema rangtoka liasü.

Assistant Commandant Sagar Borade temang tang tajungba lir aser pa maneni asadanga atadar. Pa tasü aitba, lenisüba aser bendanga agüja inyakba ya India indang security forces tatishitsü ka lir.

Iba operation ya kanga tongtibang asünung CRPF DG GP Singh-a Chhattisgarh nung amenoka lir aser pai operation achaayangdar.

Bilawal Bhutto-i yimjung atema ayongzük



New Delhi, Monupii/May 6 (Agencies): Pakistan People's Party mendenbuba Bilawal Bhutto-Zardari-i ashiba agi, India den yimjung atema Pakistan renema lir. Anogo ishika tejakdang pai Indus Waters Treaty thitsüba dak sendakba nung azütokshitsü amokmerenba sülen tang iba olen lemsatepogo.

Mongolbarnü Pakistan National Assembly nung o jembiba mapang pai ashiba agi, "India-i yimjung lenmang nung jajanera parnok teka mejemteper masü saka salar arudakjang. Parnok teyazü kuli masü saka kuli tejangja bener arudakjang. Asenok kidanger ama mener ochi jembitepti."

"Parnoki aji ta mesünüra Pakistan nungertem apudaksü atema yangluba masü ta parnok nem bilemtetdakjang. Pakistan nungertem raratsü atema renema lir aser aji mepetmesü meimba agi masü saka nüjiso meimba agi lir," ta pai ashiba Dawn sangdong ka ajanga

metetdaksü.

April 25 nü Indus River Treaty dak sendakba nung Ato Kilonser Narendra Modi-i telangzüba agütsüba dak sendakba nung Pakistan longjemer nokdaksü ta ashiba sülen Zardari-i tang yimjung atema jembio.

April 22 nü Kiralongrartemi Jammu and Kashmir kübok Pahalgam tesem amakba sülen kidanger linük ana tsüngda tensa mejungi kümer lir. Iba lendong nung nisung 26 asü, shirnok alima penzürtem timba liasü.

April 23 nü India-i Indus Waters Treaty thitsüba densema Pakistan den tesendaktep mayutsü atema jenjang agia Attari nung arrtsü crossing shibangtsü aser diplomatic tesendaktep jenjang ajemja liasü.

Social media platform X-i Bilawal Bhutto-Zardari indang account shibangtsüogo. India-i tzü nokdangra Indus ayong nung azü ayimtsü ta ashiba sülen iba tenokdangba agüja liasü.



Hyderabad nung 72buba Miss World pageant magi tsüngda Miss Portugal Maria Amelia Baptista agizükba noksa nung angur. 72buba Miss World pageant ya Telangana nung May 10 nungi 31 tashi agitsü.



TIR YIMYIM YIMOBILEM (EDITORIAL)

DIMAPUR WEDNESDAY, MAY (MONUPII) 07, 2025

Mokokchung ya shir meyong ?

Taküm küm Mokokchung town nung moatsümung ayongzüka amung dak, tangar jaoka yur Aor walunir aser nokinketertem lishitsüing nung tsüingsangdaksüba angu dang konganga mali aser koma-anga mereprang peisasa pei danga akseta bilemogo. Atangji, ibaji shiba dang atongtsü aser aji atema shiba aitsütsü ? Aji oda, lishiji tzüinglu aruba agi adokba aser tzüingluji ka maru asünungbo, ashiko, asenok kati ka menguteptsüsa auyi agi longpanga yur tsüingsangtepla. Ibaji anganüyonga manganüyong asen meyong Mokokchung lir. Iba ama aseni asensasa yanglutetba maksü tia ajurudang, jet ta Mokokchung ya shir meyong (?) ta asensasa asüngdanga kibur bushitsü tenzüker. Aji oda, tenüing Mokokchung asünungji Mokokchung yimer meyong asü mesüra Mokokchung town küma aliba ali kiburtem meyong asü ? Mesüra Mokokchung town dak kongshia aliba assembly constituency-tem nungi adokba MLA-tem meyong asü mesüra Mokokchung district nungi adokba MLA terprongla meyong ? Mesüra MMC pur meyong asü ? Mokokchung town ya Aotsür Aor ajak meyong ? Item rongnungji shibaibo Mokokchung town ya kü meyong masüa ta shitettsü ? Aji oda, Mokokchung town nung dang masü saka Mokokchung district nung langka tajung ka inyaktetba lira, iba nüngsang jagi asenok ajak nümadangtettsü aser iba tenüing tajungji asenok ajak agitsü. Kasaji, Mokokchung district nung langka tamajung aser tamakok atalokra, iba maksüjia asenok ajak kasasa alemtsü, kechiyong Mokokchung-ji asen lima aser yangji mapa nunga aser tagitsü nunga asenok ajak kasasa shilem lir. Aji oda, Amguri len nungi Mokokchung-i atu tenzükdang yongi Mokokchung district nungbo National Highway nunga kibur mali ama lenmang anepalur mali akümba reprangteter. Ano, külen Mariani leni atudangbo tatsüka shi turbo Mokokchunga tangaleni belena bener ao ama bilemtsüsaba tia ka nung lir. Aji oda, kasa shirangersa asüyonga Mokokchung district nuung shirangertem asoshisa shisabolu tuluba akümer, kechiyong taneptsü bushiibo Mokokchung district adena aotsüsa akümtsü. Aji tatem masü saka Mokokchung district nung azünger kaketshirtembo class ter aser terana ajangtetbaji shisabolutsü tetenzüker akümer, kechiyong sensaker azüngtsüsa government higher secondary school-a aser college-a peria maka, anungji tangaleni oteter tashi oa azüngtsü aser mouteter tashi mezüingi anentsü. Iba jagi Mokokchung district ya tazünger adokdak masü mazüing anendak tesemang ka küma odaktsüdagi. Iba ama tia tamajung ka nung aliba ya asenokia meteter asü memeteter (?) Aser reprangteter asü mereprangteter ? Asenok yimtsüing shia Senso Mungdang lokti senden nunga kechisa jembir ? Lokti mungdangtem nunga kechi onüksa benoka ken o lemteper ? District Planning & Developmeny Board senden nunga kechi tebilemtsü indang nungang temulung tagütsüba jembir ? Asenok Moatsü amungdak tangar Naga kintem jaoka yur, lishitsüing nung tsüingsanga sayutsüsa litetba kinji Aor asü Maor ? Itemji bilemdanga asenoka nüchi küma arudi aser Mokokchung ya election nung vote alidak aser ayokdak bazar mekümdaktsüi, yimtsüyimbui tagitsü ken o ashidak, yimten aser lokti lenirtemi nübortem lia aotsü len tajung sayudak, arogo lenirtemi ochi lenmangi nir aodak aser nübortem pei temeten aser pei lima meima ochi jembitsü, shitak inyaktsü aser Mokokchung ajungtsü atema nia kechi agütsütsü aser kechi inyaktsü ta bilemba shisatsü aser tangatetba aliba senso kaka küma alitsü nüngdakbaji tang asenok lishitsüing nung molushishiba tiaba jagi akanger. Atangji, asenokibo Mokokchung asayadak lishitsüing nung molushishibaji dang angu, saka tangaribo asenok Mokokchung district nungi poktetertem ya Mokokchung nung dang masü saka Kohima aser Dimapur nunga lishitsüing nung tsüingsangba angur. Iba jagi Mokokchung nung lishi adok manener südi. Alima tesem kong lidir liang, ni Aotsür aser Aor ta bilemer ajak Mokokchung kiburtem asütsü, anungji sen yong aser mapa tilaka yong mesüra yimten nung tata menden ka ajangzüksü asoshibo asenok shingaia Mokokchung akhüm me yokli !

OLEMSABANG

ALIMA TATEMPANG PUTU TSÜNGREM O ATALOKER:

~ T.N. Jamir, Mokokchung

(Yashi adok nungi...)

Reprangang kobi meli- Israeli Yirusalem tenlaki teyong nung koba Muslim nungeri asüba "Dome of rock" (al-Agsa) lir yangi bomb pokloktsütsü atar; aji Yihuda nunger putir (Rabbai) ta ajar parnoki ashibaji, Abraham Tsüngremi kodang meladir idangji bombji agütsütsü ta jembir. Anungji 3 world war ya 1993 tenzükgoko ta ashir, Russia-i Ukraine amakba ya manentsüji kobi meli-i warji alima dang sangdonga tenzükkümsa. Alimli ipoker mapang nungi alima nung rara manendangbaji Israel kin ya lir; aji Israel kin mejatetdang Abraham mapang nung tenzüker. Tsüngrem nisung tamangdirsang rarai aona ta bilemtsü akok saka pa ya tenur chir tanük Lot tsükchiri maka bener aoba rakzüksü meji rara tongpangi aoba lir. Lipok 14:8-15. Anungji tamang yimsü ya ochi asoshi raraba lir. Yamaji Abraham nungi jakzükbata telok asem Yihuda yimsü, Muslim yimsü aser Khristan Yimsü, asemji tanü tashi kin ajak den rara manener. Ano Abrahami tarongba tenla nung aibelenbayong Ner semchirtem ljep nung küm noklang pezü alarsa alitsü Tsüngremi ashi. Yamaji parnok küm noklang pezü (400) timtema ali; saka Tsüngremi parnok anitet. Tenangzükbata limai anir atokdang memejeptokba kintem makdoker alitsü? mela. Temalen shisemba ama tejen putu nung tenüki ngua tsükchir tepset, saka tasen Lai tendak Yisu tesayuba tsükchirji Efesa 6:10-19"Kechiaser asenoki shi aser az? anema memelangteper, saka tongtipangtem anema, aintem anema iba amang lima yimsüsürtem anema, anung tema nung tanela tamajung alibatem anema asemoki melangteper.

Aji temenen tongpang tapu ana shirnok nem Tsüngrem Tanela tangatettsü ali parnoki dang angatettsü. Ano tang tashi Yihuda yimsü aser Muslim yimsü ana yagibo ashir; "Ne tsükchir tepsetang (Kill your enemies), saka Yisu tesayubaibo ashir; "Nai ne tsükchirtem dang meimang" (Love your enemies).

Reprangang tanü alima ajunga Government, Yimten, Arogo, na aser ni shinga jenbua mali. Rongsen arishidang yazü yazü agi menokpanger litepdang asen tanela sentokba memeteter, shitak mesükba lenmang nung jaja-a aika ochi nungi pilaa liteper. Anungji adianu na Arogo tamanger rongnung Yisu majurutsüsa asen tamang ya tangar den memedemdangli, asen dang Tanela renemedi arung, shibai metet tia makara asen limaa tamangertem azütokshitsüsa tua arutsü akok. Angatettsü atema;- Ano Bethlehem Yisu asodang küm 2 teküpok teburchanu kwi tepseter alitsü. Ano mezüing jilia Yisu osang abensang Baptitsüba Yohan tekong tanga tenzüker. Kodang Yirusalem nung Yisu tepset, iba sülen Pa nütsüngtem yimya balala agi reshikangshia tepseterang ano tamangertem aika putener na Yisu dak amangtsü asü Kaisar dak amangtsü ta asungdangli asü. Kaisar dak amangtsü ta ashirtem chiokli, Yisu dang amangtsü ta asürtem kar tekong tangzüka yokli, kar nashi tekong nung ama ranga iba züji par tsüngrem nem tenla agütsüli ta tepset. Tanü reprangdangang alima anüdok-anülü ajak kinük pezü sülen Yisu dak amanger kwika tepseter. Ni asangwa temulung meyiper Counsellor ka ama senzüdang Ao lima yimti tulu ka nung Revival alidang sayutsüingir M. I. Luin-i ashiba bilemteter. Pai ashibaji, "Tenyartem mapang tamangertem tekong tanga tepseta aru, aska asen limabo Yamaji marutsü. Saka election nung aika sen nung aibelentsü aser aika molumii aotsü ta ashi. Anungji Lai nung Noa tensa ama alu yima kipa kiyima alitsü ta ashibaji sobalibaa alitsü indang o. Saka adianutem asenok dang temulung meyipa Khrista agizüka tanaben sor renemer atadi. Reprangang! Tanü asen putu yabo Noa tensa dang terben (10) agi tamajungba ashikelak mapa inyaka sen meji nisung tepsetba ya koda Tsüngrem tsüngdang tesempatsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Jharkhand nung Khristanpur reshikangshiba aitsür

Ranchi, Monupii/May 06 (Agencies): India anüdoklen Jharkhand nung political party kar teyari nung "anti-social groups' temi tribal Khristantem tanen makai reshikangshia amshiba atema iba state nung arogo lenirtemi ola adok.

"Item anti-social groups ya temetetba political party tem densema tashi tulubai nungiter; aji mesüra parnoki komasür parnok sasa ozüing amshitsü?" ta Bishop Theodore Mascarenhas of Daltonganj ajanga ashi.

Jharkhand nung tribal nisungtem ajangzüütsü asoshi Khristan missionary temi mapa tajung inyakba amena campaign tenzüka lir ta pai ashi.

"Tanü-asüingbo anti-social elements kari tamendak dak mesüra kuli tejangja meliaka tamangba yimsü melendaktsüba tai tongloktsür, shirnoki state nung tesunep maginer," ta Mascarenhas-i UCA News dang shia liasü.

Tawa par arogo nung Khristan kibong trok pei ki yutsür tetsübo nung jena aoba indang pai athishia ashi.

Latehar district kübok Hata yimtsüing nungi item Khristan kibong ya Jharkhand nung tribal telok balalai April ita tenezüklen amungba benjong, Sarhul atema senotsü tenla magütsüba yong Hindu bhukumba telok kati amokmerena liasü.

Kibong trok April 28 nü yimtsüing yutsür ao, ta yangji aliba ETV Bharat news channel ajanga ashi.

Khristanpur Nageswar Oraon, shiba tang par kibong den külemi anasa yimtsüing ka nung alir, pai ashiba agi,

parnok ket nung sen makaba yong benjong atema sen magütsütettsü ta shia liasü.

"Onok Khristanpur asüba yong yimdaklir kari onok amokmeren aser merenshi," ta pai ashi.

Kidanger Bihar state nungi pastor kati sarasademsüba ajanga pa kinungtsü aser kinunger ka taneptsü anguba sülen küm 15 shi jakdang kibong trok-i Khrista agizük, ta Oraon-i ashi.

Kodarma district kübok Chatra yimtsüing nung Khristan yimsü sülen anidakba mechi yimdaklir temi Khristan kibong toku April 25, 2025 nü yimtsüing nungi jentok.

Tribal customary laws ajanga jentokba nungya yimtsüing nung lokti nung shilem magidaktsür, takum alitsü asoshi lenmang ajak nokdanger, tzü, chiyongtsü aser danga nüngdakba tem magütsür.

Parnok ya tribal Hindu dangi tanaben meyipba sülen ang yimdakliri agizüktsü.

Osang ajanga ashiba agi Chatra nungya kibong 40 lir aser yangji kibong toku-i küm aika tejakdang Khristan yimsü agizük. Tanüingba yimdaklir ajungai Khristanpur den tesendaktep ajunga rakdangogo.

Chatra nungi tamanger Rajesh Bhuia-i osangbener dang ashiba agi, küm 10 shi jakdang parnok ya tashiyim kecha makai parnoki mulunga Khrista agizük.

Ketdangsür temi tamangba yimsü melenba ya pei sasa mesüra ajungshiba mesüra mesüzükba ajanga asü masü ta bushisüngdangtsü April 26, 2025 nü totuyuba ka agütsü.

Local administration officer Megha Bharadwaj-i

osangbener dang ashiba agi, lokti nungi jendokba ya bushisüngdangtsü.

Taoba mapang Jharkhand state sorkar indang tribal advisory committee nung züingsem Ratan Tirkey-i ashiba agi, Khristan missionary tem anema campaign ya küm ishika tesashiba kumogo.

"Tribal nisungtem indang oshi, sobaliba aser yimsü-yimbong nung missionary temi teka sangshir ta tenüing asüner," ta Catholic tribal leniri ashi.

2017 küm Jharkhand nung renemba anti-conversion law nung tashiyim amshia mesüra mesüzüka tamangba yimsü melendaktsüba asoshi küm asem tashi tepuokdak ayutsü aser senchi sen 50,000 achitsü shia lir.

Nisung kari tamangba yimsü melennüra district nung ketdangsür nem kuli aser tamangba yimsü melenba tesem indang osang agütsütsüla, aji mesüra merenshitsü ta shia lir.

Ano tanur aser tetsürtem, tribal minorities aser jenjang tekübokba nung aliba kin tem tashiyim amshia tamangba yimsü melendaktsüba atema temerenshi tesashiba lir.

Khristanpuri tashiyim aser takzütakbong yimyatem amshir ta Hindu nationalist temi aiben tai tonglokja yimtsüing telungi nungboka ayir aser "reconversion" sentong agia Khristanpuri Hindu nunger külemkejaba yimya amshitsüsa akumer.

Jharkhand nung nütsüing yongsük million 33 lir aser yangji Khristanpur million 1.4 lir aser parnok ya timba tribal nisungtem lir.

Iba telemsa yagi rongsenketzüing aser yimtenren tsütsü jenjang tajungba nung aliba Meitei nungeri tajemzükbba jenjang nung alirtem asoshi sorkari sentong balala yanglua aliba nungi parnok tajangzük angutsü.

Meitei nungeri amokbanger aliba state sorkari azüdokshi nung Meitei nunger yarir ta parnoki aitsür, koba ajanga nisung aliba ki 11,000 aser tekülem ki aser arogo indang reju 360 shi raksatsüogo.

Federal sorkari Hindu bhukumba Bharatiya Janata Party (BJP)-i aniba state sorkar anentsü aser February 13, 2025 nü nungi tenzüka iba state ya federal yimsüsüba küboki aitdaktsü.

Manipur nütsüing yongzük million 3.2 aliba nung Kuki-Zo

ANO GO ABEN TSÜNGREM DEN

Meshitettsü aser yok

Ochi nung parnok meshitetjang: Ne O ochi lir. Nai kechi koda alimai ni yok, yamaji Nia parnok alimai yoker.

Yohan 17:17-18.

Tsüngremi teti na meyokdang tama meshitettsür. Tebui nütsüing tera ana shimtet aser temeshi ochi, Pa jabaso ajanga meshitettsü. Parnok Yisu den sendaktepa ali nung ochi agi (Yn. 14:6) nütsüingtemi ochi ajanga aser osangtajung sayutsüingitsü asoshi renemtsü. Yisui parnok tejangraba jazük (challenge) (Luke 9:46-48), parnok tamang ilaba indang ashi (Matt. 17:19-20), Satan arutsü (Matt. 16:23), aser parnok asükümba aitsü (Matt. 26:33-35). Kodang Yisui parnok renemtsüba atema alimaji aki ama malitsü saka melenshidaktsütsü ain agütsür Pai parnok alimai yok. Temeneni Tsüngrem tsüngdang na tamakitsü kümdaktsür ta Satani puatsü akok. Tiyazü tulu nungi ibaji tiyazü aruba asütsü. Nai temenen menali Tashioktsübai "Nai tamakok nguogo. Na tang joko Tsüngrem tsüngdang takidak maka" ta ashitsü. Iba yagi Khristan ka dangi tamakokji tali shisanga aser tali teyimla makaba kümdaktsütsü. Aji saka, Tsüngrem tanela ka nüji kümdaktsüba kecha dena medemdangtsü makok. Kodang Tsüngremer nüburi Tsüngremer ochibaji Tsüngrem mulungba nung ayutsü mulungtetdir, idangji Tsüngrem ainji mezüing nütsüingtem nem agütsüba ama parnok ajanga kasa yoktsü.

Ochibai na nüji kümdaktsütsü. Ochiji "Asenoki asen temenen nangzükra, asenok dang asen temenen adoktsü aser memeshiba ajak nungi asenok merükdaktsütsü, Pa temulung lemtetba aser ochi lir" (1 Yn. 1:9), aser asenok Tsüngrem asoshi alitsü agizüker.

ajanga yimjung tanaben alitsü asoshi inyakba atema otsü danga ashir, ta arogo lenir yagi UCA News dang May 5 nü ashi.

"Takok anguba kaji federal sorkari taoba ita telok ana den mezüing senden mena jembishinüba ya alitsü," ta ano arogo lenir kati ashi.

Meitei nungeri Imphal Valley district tem amokbanga lir aser Kuki-Zo nungeri tenemlen amokbanga lir. Telok katia pei kübok aliba tesem nung nüburtem sadoksayima senzütsü memelar, ta arogo leniri ashi.

Onok kanga timtema lia arur, tanurtem education, chiyongtsü mesüra anepalu mesüteter, anungji tekeraba nung tanaben yimjung bener arutsü tongtipang lir, ta arogo leniri ashi.

AO OSHI ANGAZÜKDAK:**TANÜ ANGAZÜKTSÜBA OJANG****Temko**

(n) ozümi asongba korang (traditional heargear to fix feathers)

* Teburtem tsüngsang dang temko kurang asemer.

Temla(adj) limapurtemi tsüngrem nem chiyongtsü tilala yutsüba
(ritual of offering food to spirit in banana leaves)

* Limapurtemi temla yuja tsüngrem külemer.



Tir Yimym

OLONG PAITEP # 7144

	1				2			3		4
5								6		
7			8							
								9		
		10								
11										12
					13					
					14					
15										

TIPIEN

- Balaka
- Aika shirangba
- Tar tatsü
- Nenü'er jabaso
- Sen latettsüba
- Tangar kübok alir
- Lon nung inokba
- Tzü ayimdak
- Ajok

LANGTSÜNGLEN

- Hai sür inyak
- Aor tenüing ka
- Ali telungi talangka lur
- Tebang kenyongi mazüoker
- Ken atema anenzükertem
- Toktepa noktak
- Sen
- Benjong agi
- Telung nung rizünga ayu
- Tebang nung enok

OLONG PAITEP # 7143 TELANGZÜBA**TIPIEN :**

- Aben, 4. Artsü, 7. Lisem, 8. Liwa,
- Sarasadem, 12. Aket,
- Mangu, 15. Anünü, 16. Ango.

LANGTSÜNGLEN :

- Aruli, 3. Balala, 5. Suwar,
- Belem, 9. Süjak, 10. Aonung,
- Dokan, 13. Tinu.

Happy Birthday**TENÜNG**

Tasoba anogo
Küm
School
Talidak
Semchir Kiten Aier, Tsüngrem taochi nung küm 10 tashi anir arunung Pa tenüing asanger. Ano maneni Tsüngremi la nem arishi talang moajangma.

-Temeim Otsü & Obou, Tzudikong Town.

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimym bureau tem nung agüjang.

- Tenüing
- Tasoba anogo
- Küm
- School
- Talidak
- Salem osang

Tepela Tasoba Anogo**Digboi nung tashiyim agi BJP züingsem ka kou ongdoktsü****Dibrugarh, May 6, 2025****(Agencies):** Assam kübok Dibrugarh district nung nisung telok kati BJP züingsem ka dak tashiyim agi kou ongdoktsüogo.

Assam nung panchayat elections mapang phone nung jembiba ka prokshiba ajanga Moran nung jashidakja liasü aser iba atema nisung kari tejashi nung BJP züingsem kou ongdoktsü.

Borhajan Panchayat kübok Ward No. 7 nungi independent candidate Junmoni Moran-i BJP

MLA Suren Phukan den raratepba video ka prokshi. BJP MLA Phukan-i model code of conduct alema inyaksangshi ta Junmoni Moran-i tai tonglokja tena raratep.

Iba video ya social media aser state media nung kanga prokshia liasü.

Iba sülen MLA Phukan'er pusemertemi Doomdooma Police Station nung Junmoni Moran anema FIR ka benok aser iba nung ajemdaker la apu. Moran tepuokdak lia

Congress lennir Lachit Moran (Rajiv) aser Digboi MLA Suren Phukan den yariteper Nani Gopal Dutta tsüingda obang meputep raratepba phone recording ka prokshi.

Iba phone recording nung Kalpajyoti Phukan-i Tingrai nung Lachit Moran alibaji lendong ka ama shia lir.

Iba recording ajanga Moran nung jashidaktsü aser parnoki Kalpajyoti Phukan par Bogapani kidang nungi tashiyim agi anizük aser Tingrai market-i anir orr yimjak nung pa indang kou ongdoktsü.

Iba tatalokba indang video footage ka online nung prokshi aser police tesem tonga ao. Idangji police aser nübortem tsüingda raratep aser police-i Akash Moran dang asüingdangya asütsü atema apu.

"Onoki iba tatalokba bushisüingdang südar. Public ajungmesoba atema nisung ka pua lir. Onoki tangbo iba dak sendakba osang tejanga meshitettsü" ta police ketdangsür kati ashi.

Assam Cabinet-i Rs 7,700 crore investment agizük**Guwahati, May 6, 2025****(Agencies):** Hombar aonung Assam cabinet ghonda 6 senden amendang wadang balala atema Rs 7,700 crore endoktsü telemtetba agiogo.

Advantage Assam 2.0 summit mapang bendangertem den tesentaktep yangluba nungi Rs 1,500 crore angutsü ta CM Sarma-i ashi.

"Advantage Assam 2.0 summit mapang asenoki memoranda of understanding (MoUs) sign sütepba nungi item ya angur. Item tenangzüktep

ajanga Assam nung direct employment opportunities 16,446 adoktsü" ta pai ashi.

Cabinet senden nung Guwahati aser Meghalaya kübok Umiam sendaktepba six-lane road ka dena lir. Iba ya Guwahati-Panchgram controlled-access highway project den khenyongi balaka lir ta CM Sarma-isa metetdaksü.

"Iba lenmang ya Guwahati-Panchgram controlled-access highway den shilem kecha malio saka project balaka kübok adentsü" ta paisa shisem.

Assam sorkarisa Srirampur-Guwahati, Guwahati-Jorhat, aser Jorhat-Dibrugarh corridors nung controlled-access highways sentong lir aser item ya küm 5 completion target nung inyaksü.

Centre sorkari Guwahati-Panchgram project nungita yariba atema pelar ta CM Sarma-isa ashi.

Iba mapatong ajanga Barak Valley nem Jowai aser Haflong lenmangtem den külemi lenmang tasembuba agütsütsü ta paisa shisem.

Mizoram police-i methamphetamine seret 236 apu**Guwahati, May 6, 2025****(Agencies):** Mizoram police-i Hombar aonung mita aodang Champhai district nung methamphetamine tablets seret 236 puogo.

Dungtlang Police Station telok kati Bungzung leni aoba Bolero gari (MZO1G-7112) ka soter mita repringdang Rs 30.72 crore alang drugs bena aliba angu.

Iba gari nung nylon bosta 8 nung methamphetamine tablets

bena liasü aser seret odangdang 236.33 kilograms liasü. Iba dak alia police-i Rs 2,89,500 aser gari puogo.

Police-i iba atema Champhai Vengthar nung alir nisung ana apu. Tena ya Laltanpuia (30) aser Vanropuia (27) na ta jangjaogo aser tenaprong ya Lalchamreia'er jabsotem lir.

Narcotic Drugs and Psychotropic Substances Act nung sections 22(c)/25/29 kübok tena anema ken o ka benokogo.

Iba sülen police telok kar Kolasib nung drugs agitsüpurtem aputsü atema yok.

Idangji parnoki Nirupan Nath (27), Lukman Uddin (33) aser Sagardey (27) nung apu.

Ketdangsürtemi drug trafficking network raksatsütsü atema mapa inyaka arur anungji Superintendent of Police, Champhai Shivendu Bhushan, IPS lenisüba kübok iba ken o bushisüingdang südar.

Gaza nung ceasefire atema sensaksemtsü nüngdak mali: Hamas

Gaza City, Monupii/May 6 (Agencies): Gaza Strip nung nüburtem ya-tzüra toktsütsü atema jenjang agi aser kin ajunga samatsütsü atema jenjang agi tashi Hamas puri Israel den ceasefire atema sensaksem magitsü, ta iba telok nungi ketdangsür tejen kati ashi.

Basem Naim-i Mongolbarnü AFP news agency dang ashiba agi, Gaza nung nüburtem ya-tzüra toktsüba aser tepsetba aibelen ya tembangdaksütsü atema alima kintemi Israel Ato Kilonser Benjamin Netanyahu-i aniba sorkar nongshitsü nüngdaker.

"Gaza Strip nung nüburtem ya-tzüra toktsütsü aser kin ajunga samatsütsü atema jenjang agi tashi sensaksemtsü mesüra ceasefire atema ken o tasen benoktsü asoshi kecha nüngdaka madoker," ta pai ashi.

Netanyahu-i, military operation tasen ka benoka inyakba mapang Gaza nung aliba nüburtem Israel nunger sepaitemi tanga tesem kati anintsü, ta ashiba sülen anogo ka lir Naim-i iba olen ya lemsatepa liasü.

2023 küm October ita nungi rara tenzükba sülen Gaza nung alir nütsünyongsük million 2.3 ya ajak amai pei talidak ki toktsür jenshiogo.

March 2 nü Israel-i, Gaza-i oset kecha bener meyoktsü atema tenokdangba agütsüba sülen Gaza Strip nung tensa kanga mejungi kümogo aser Israel nunger sepaitemi enclave kübok tesem balala maneni amakba mapang chiyongtsü agia kanga anünga kümogo.

Al Jazeera osangbener Hind Khoudary-i central Gaza nung Deir el-Balah nungi ashiba agi, pei tanurtem

mesütsü atema Palestine nungertem kanga timtemtepdar aser parnok karbo mapang süier aliba chiyongtsü aser chiyongtsü tashi achitsüsa kümogo aser kasa mapang nung karbo taküm liyonga aotsü atema lenmang kecha monguteti lir.

Palestine Red Crescent Society (PRCS)-i iba hopta ashiba agi, Gaza nung local market aser humanitarian distribution centre tem ajak nung chiyongtsü maka kümogo.

"Nüburtem aya wara agi meneptsü ana nung lir," ta PRCS-i ashi. "Pei ki toktsür jenshia or alir million ka dak tema anogo nung pei nüngdak tera danga meperitettsüsa jenjang kati iogo," ta kasa sangdong ajanga metetdaksü.

PRCS-i ashiba agi, legumes ishishi dang community kitchen tem nem lemtsüdar, keciyong taoba mapang bendena aliba ajak agimaogo.

International Committee of the Red Cross (ICRC)-i tensa kanga mejungi akümba süoki ia bilemba lemsatepogo aser humanitarian teyari tangsa tang takaratiba nung yoktsü ayongzükogo, aser ken o ya yimden yimsüsüba den m e s e n d a k t e p t s ü t s ü tekümdangtsü metetdaksüogo.

"Gaza nung aliba nüburtem tenüngdakba kanga aika kümogo," ta ICRC otongdar Christian Cardon-i ashi.

"International humanitarian temzüng ozüing kübok, parnok tazüokba nung aliba nüburtem tenüngdakba peritsütsü atema takokba tashi inyaktsü Israel khuret lir," ta pai ashi.

Kasa mapang nung arishi küm 39 tain Awad, shiba Khan Younis yimti nung süki ka nung

alir pai Hombarnü Al Jazeera dang ashiba agi, "Israel-i rara, tepsetba, bomb pokloktsüba, raksatsüba, tesem balala atsünga aoba aser nüburtem ya-a tzüraa toktsüba manener, anungji parnoki military operation atsülangtsüba indang kodaser jembir."

"Ni alima dang ya-tzüra anogoshia timba küma aoba reprangdangtsü ayongzüker," ta paisa shisem.

Gaza City nung alir Aya al-Skafi-yi Al Jazeera dang ashiba agi, lar tanur chiyongtsü peria manguba aser mozü agi anüngba ajanga taoba hopta süogo.

"La ita pezü tain aser tozük seret 2.8 liasü. Chiyongtsü peria machiba ajanga la blood acidity, temesen aser tezüing mapa minyaki aküm aser iba den ano tanga timtem aika adok. Malnutrition ajanga la ku aser temezüing dena tsüka liasü," ta laisa shisem.

Sentong balala yangluba leak asüba ajanga ashiba agi, Israel sorkari Gaza nung chiyongtsü alemba ya kanga tesashiba aziökner aser United Nations aser tanga humanitarian agency tem melen United States indang company tem nem chiyongtsü lemdaksütsü atema benokdar.

Iba sentong kübok Palestine nunger kibongtemi southern Gaza nung pei tata tesem nungi hopta nung khi chiyongtsü parcel ka bener otettsü aser Israel-i anogoshi truck 6 Gaza Strip-i aitsü melatsü.

Aid groups aser UN-i iba sentong ya magizük aser ashiba agi iba ya takum kümzüksü atema agütsüba supply tem aziöktsü atema tasa tamajung ka lir.

"Europen-i tashi tait Germany nüngdaker, iba yongji asenoki anogo tali matatettsü," ta pai German TV dang ashi.

Parliamentary group leader Jens Spahn-i külem pur tem dang "Europe ajunga, aser alima ajungai iba ballot repranga lir," ta ayongzüka liasü.

Merz-i tamakok ajuruba ya pa asoshi maksü ama repranga liasü aser ibai Social Democrat SPD nungi züngsem kar mechi asütsü, shirnoki Hombarnü par conservatives den coalition deal ka yanglua liasü.

Mezüng vote nung MPs 630 nungi par toku maliasü, aseme vote magütsü aser ka invalid liasü, ta Bundestag tiri ashi.

SPD nung ajakbo coalition deal nung pela meliasü, saka party ketdangsür temi temulung meranga nokdak.

February ita election nung jenjang tanabuba nung vote shilem 20.8 anguba far-right party Alternative for Germany ajanga Merz-i mezüing tamakok ajuruba nung ajemdaker elections tasen agitsü ayongzüka liasü.

Menungra Bilemteter



ASO :
01 March 1924

ASÜ :
07 May 2024)

Asür Alimeren Jamir

"Temeim Oba, na iba lima nungi pila or küm ka abensaba anogo nung ne taküm tajung aser ne temeim bilemteter. Na onok den meliaka ne temeim aser ne sarasadem onok mulungjang nung teti lir aser onoki kodanga mamateter."

~ Chirurtem, Semchirtem, Phunertem aser Kinungertem

OFFICE OF THE
CHUBAYIMKUM UNION MOKOKCHUNG
P.O. Mokokchung - 798601, Nagaland
TENÜNGSANG AGÜTSÜR

Kr. CHUBASENLA JAMIR,
Wb. Limatoshi Jamir aser
Wt.Toshirenla Longkumer tena jala-i
Nagaland Public Service
Commission, Combined Educational
Services Exam (NPSC-CESE) 2024
nung takok tajung nguteta Department
of School Education küpok Graduate
Teacher (Mathematics) jenjang tulu
ajangzuktet nung Chubayimkum
Union, Chubayimkum Unionsür,
Mokokchung aser Chubayimkum
Students' Union ajanga khonang
tetushi tenungsang tulu agütsür.



Tarutsü lanuasensortem asoshi len tuyuba wadang nung
ajemoka inyakdang Tsüngremi jala taküm maneni temabai
ajungketa moajangma.

Sdl-
Wb. Supongmeren
President

Sdl-
Wt. Tiasangla
President

Sdl-
Sb. Suponglemba
President

F.G.N/NNC AO REGION, OKING: KORIDANG
SANGDONGER

The 75th Naga Volunteer Plebiscite Day 16th May, 2025 Kohima
Local Ground nung Naga nunger ajak senteptsü sentong ka Naga
Youth Movement ajanga renema lir, anungji Aoli yimsüing ajak nungi
Naga National Workers aser yimsüing yimsüsürtem temulunger
ajak arua atentsü ayongzüker.

Iba den ozü yimsünga plebiscite nung tena lir ta tangatetba
nung voluntary donation-a temulungertemibo tenladaktsüner ta
mepishia sangdonger.

Sdl-
Imo Imsong
Medan Peyu Ao Region
Oking: Koridang / 8575398093

Ao Riju Sangdong

Ao Riju-i (Ao Academy) achaayanga agiba Arangtet Tatidang
(AT) 2025 atema Monupii 12, 2025 anogo nungi tatidang Shiyim
(Form) tekübok agüja aliba tesemtem nungi angutsü.

i) Wb. Aotemjen Jamir M/No. 8731821467 (Kohima)

ii) Wb. P. Alem Jamir M/No. 7005501457 (Dimapur)

iii) Ao Riju office M/No 9089816427 (Mokokchung)

Agüja aliba tesemtem nung meinyaktetbapurtem ajak office den
tongtepratepa inyaktsü metetdaksür. Iba AT nüngzülu Aami 30, 2025
tashi alitsü.

Sdl-
Rev. Prof. Rongsen Lkr
Chairman, Ao Riju

Sdl-
(I.Temjen Tzüdir)
PIH, Ao Riju



Bangladesh indang taoba ato kilonser Begum Khaleda Zia ya Dhaka
nung aliba Hazrat Shahjalal International Airport nung lar party
lenirtem agizükdang tangokba noksa nung angur. Bangladesh
Nationalist Party (BNP) chairperson Khaleda Zia ya Emir of Qatar-
i agütsüba tayimtsü ka nung United Kingdom nungi Mongulbarnü
shilang, kong la temang anepalua liasü. Bangladesh nung election
tasen agitsü akhangba mapang la linüki meyipa shilanger.

Germany chancellor inyaktsü Friedrich Merz shimogo

Berlin, Monupii/May 06 (Agencies): Conservative lenir Friedrich Merz-i Germany indang chancellor inyaktsü atema tanaben meranga parliament vote agitepba nung takok nguogo.

Mongulbarnepe vote agiba nung Merz-i nüngdaka aliba absolute majority atema vote tejang trok agi metongi liasü, koba post-war Germany puti otsü nung kodanga majangshidangba tamakok liasü. Menden 630 aliba Bundestag nung secret ballot agütsü asünung, pa indang centre-left coalition partner mesüra par conservative party nungi MPs temi pa bhukumtsü memulungba ya mejangjatet.

Bundestag nung ghonda ishika lir party tem aser Bundestag tir ajanga vote tanaben agiteptsü mulungtepa agiba nung Merz-i votes 325 angu, koba vote toku agi majority ngua liasü.

Tetenzük nungi par coalition Social Democrats ya parliament nung menden peria (MPs 328) liasü, saka mezüing vote agiba

mapang par 18-i pa nem vote agütsütsü memulung ama ajiteter.

1949 küm Germany nung democracy tanaben benoker küm 76 liyonga arudang chancellor candidate katia Bundestag vote nung tamakok ajurua mali, aser vote agütsür ghonda ishika parliament nung züngsemtem mangmangtepa liasü.

Germany indang constitution kübok vote kwiben agütsütsü shia mali, saka asangsang nung Merz yagi ano tamakok ajuru asübo par Christian democrats, par adianu Christian Social Union aser parnok partner Social Democrats party tem tekolok atsüksü liasü.

Arishi küm 69 tain Marz ya chancellor ka ama Tir Frank-Walter Steinmeier-i tezüingzüktep agitsü aser pa den minister 17 alitsü.

Bundestag tir Julia Klöckner-i Bodhbarnü ang follow-up vote agitsü bilema liasü, saka Christian Democrat General Secretary Carsten Linnemann-i tangsa agitsü tongtipang lir ta tekong meranga nokdak.



New Delhi nung Khelo India Youth Games, 2025 nung 50m Rifle 3 Positions asaya nung Maharashtra nungi gold medalist Prachi Gaikwad, Karnataka nungi silver medalist Tillotama aser Karnataka nungisa bronze medalist Anushka nung tangokba noksa nung angur.

Arsenal nungi asayar Calafiori training agi tenzükogo

Monupii/May 6, 2025

(Agencies): Paris Saint-Germain den Brehostibarnü UEFA Champions League semi-final tanabuba leg Masaya tsüngda Arsenal jenjang tajungba kümdakja Riccardo Calafiori training agi tenzükogo aser pa iba asaya atema squad nung züngoksemtüsü imlar.

March ita Chelsea goal 1-0 agi akokba sülen defender Calafiori ya tang tashi masayai aruogo. Italy nunger asayar ya March ita international break nung Nations League quarter-final nung Germany den asayaba mapang temekok yirua liasü.

Pa London nung mezügbuba leg asayaba mapang asayatsü imla liasü saka masayatet saka pa tanabuba leg nungbo asayatetsü Mikel Arteta timla alitsü, kechiyong mezügbuba leg parnoki mekoki lir asünung tanabuba leg ya parnok asoshi

kanga tongtibang asütsü. Calafiori den ano Jurrien Timber-a training agi tenzükogo, shiba Bournemouth den asaya nung shilem magiteti liasü.

UEFA temzüng ozüng kübok Arsenal pur parnok indang training session shilem ka camera matsüngdang Sobha Realty Training Centre nung agitsü nüngdaker, kong wingback ya training agiba nguogo.

Hopta tatemi Arsenal puri goal 1-2 agi AFC Bournemouth makokba sülen Arteta dang Calafiori aser Jorginho na indang asüngdanga liasü. Spain nunger coach yagi Italy nunger defender ya Premier League nungbo masayatetsü saka UCL indangbo mejangja, ta ashi.

"Calafiori masayatetsü, Jorginho-a maneni masayatetsü. Jorginho yiruba ya imlaba dang nungi tebenjaba. Anogo ishika atadanga lidi," ta Arteta-i ashi.

Calafiori, shiba tang asaya

aliba season nung Champions League nung tenetben tashi masayai liasü, pai round of 16 nung Arsenal-i goal 7-1 agi PSV Eindhoven akokba asaya nung teyari tulu agütsü. Iba den bendenloksema left-back asayar ya Premier League nung 17 ben asayaogo aser iba mapang goal ana idaktsüba den goal ka assist süja liasü. Ajisüaka PSG den Masaya tsüngda Arteta-i tang asaya aliba defender William Saliba, Myles Lewis-Skelly, Jakub Kiwior, aser Jurrien Timber nunger memelentsü akok, aser talisa Lewis-Skelly-i kanga jung asaya arudar.

CL semifinal mezügbuba leg nung kidang asayaba mapang goal 0-1 agi tamakok anguba sülen Arsenal pur Parc des Princes-i aotsü, kong parnok 2006 küm sülen tang mezügbuba UEFA Champions League final atongtsü atema Luis Enrique-i aniba team den asayatsü lir.

Rampaul West Indies bowling coach kümogo

Monupii/May 6, 2025

(Agencies): Cricket West Indies (CWI)-i Mongolbarnü sangdong ka ajanga Ireland aser England na den asayatsü aliba asayamung atema asayar 15 agi kümtetba squad ka sangdongogo.

Shai Hope-i aniba team ya May 21 nungi 25 tashi nung Ireland den ODI asem asayatsü aser iba sülen May 29 nungi June 3 tashi England den asaya asem asayatsü.

Taoba mapang West Indies team nungi fast bowler aser 2012 World Cup champion Ravi Rampaul team indang bowling coach asütsü shimogo. Pai James Franklin melenogo. Kasa mapang nung taoba mapang Ireland nunger all-rounder Kevin

O'Brien-a Ireland den asayaba mapang coaching staff nung adentsü.

Head coach Daren Sammy-i, iba asayamung nung takok tajung angutsü kanga temulung lema bilemdar.

"Item asayatem ya 2027 World Cup atema kanga tongtibang asütsü aser Bangladesh den asayamung nung asaya ajak akokba aser taoba küm tatemlen England akokba ajanga team renoka aoba sayur," ta head coach Daren Sammy-i ashi.

"Asayatsü atema condition kanga melarabo masütsü ta angateter, saka onoki sobaliba aser mindset ka yanglur, koba onok nükjidong atongtsü atema asayaba yimya dak rangloker lir," ta paisa ashi.

Squad: Shai Hope (Captain), Jewel Andrew, Keacy Carty, Roston Chase, Matthew Forde, Justin Greaves, Amir Jangoo, Alzarri Joseph, Shamar Joseph, Brandon King, Evin Lewis, Gudakesh Motie, Sherfane Rutherford, Jayden Seales, Romario Shepherd

Asayamung mapanglem:

- * First ODI v Ireland: May 21, Dublin
- * Second ODI v Ireland: May 23, Dublin
- * Third ODI v Ireland: May 25, Dublin
- * First ODI v England: May 29, Birmingham
- * Second ODI v England: June 1, Cardiff
- * Third ODI v England: June 3, The Oval.

White-ball format nung India maneni temaba jenjang nung lir

Monupii/May 6, 2025

(Agencies): Cricket asaya limited-overs format nung India team-i maneni asaya amokbanger asayadar aser parnok Hombarnü sayaba ICC Men's Team Rankings nung ODIs aser T20Is nung maneni temaba jenjang nung lir.

Ajisüaka Test asaya nungbo parnoki asaya mazüokteti Australia maneni temaba jenjang nung jenjang yanglushiogo.

India-i taküm ICC Champions Trophy akoba ajanga ODI nung parnok rating 122 aliba nungi 124 kümogo. Iba asayamung nung runners-up New Zealand team ODI rankings nung tanabuba jenjangi tuogo. Parnoki Australia ajatet, shirnok tang tasembuba nung lir. Sri Lanka-i kidang asayamung nung kanga junga asayaba sülen parnok pezübbubai tua Pakistan aser South Africa na ajatetogo.

Table bonglanglena jenjang melenshiogo. Afghanistan-i England ajateta tenetbubai tuogo. West Indies-i point pongu anguba sülen Bangladesh ajateta parnok tang tekububa nung lir.

T20Is nunga world champions India maneni temaba jenjang nung lir. Ajisüaka parnok tanabuba jenjang nung aliba Australia team dang nungi point teku agi

dang timba lir. Team ana sülen England, New Zealand, aser West Indies agi top five ajunger.

Maneni iba format nunga Sri Lanka team tejakdangi tua parnoki Pakistan ajateta tenetbuba tongtetogo. Bangladesh aser Afghanistan nati top 10 abensadaksür.

Taküm T20I rankings nung team 100 lir, koba taoba mapang 80 dang liasü. Taoba küm asem tsüngda asaya tibosa asayaba team tem ajak rankings küboki aikdaksür.

Test asaya nungbo India team tashi meiti kümogo. Test rankings nung Australia-i point 126 ngua parnok temaba jenjang nung lir. Tanabuba jenjang nung England lir shirnoki India aser South Africa naprongla ajateta liasü. Ben Stokes-i aniba team yagi taoba Test asayamung pezü nung asembo kokogo, aser ibayongji parnok tejakdangi tuogo.

Test rankings nung India team-i point 105 ngua parnok pezübbuba nung lir aser South Africa-a tasembubai asepzüka luogo. Top 10 nung aliba tanungba team tem rongnung New Zealand, Sri Lanka, Pakistan, West Indies, Bangladesh, aser Zimbabwe densema lir.

Ireland aser Afghanistan na asaya peria asaya maliba ajanga Test rankings atema ano temsüa mekümi lir.

MLC 2025: Romario San Francisco Unicorns nung denogo

Monupii/May 6, 2025

(Agencies): 2025 Major League Cricket (MLC) season atema San Francisco Unicorns-i West Indies nunger all-rounder Romario Shepherd alizükogo.

Caribbean Premier League (CPL) nung kanga junga asayaba sülen arishi küm 30 tain Shepherd ya alima nung franchises tulutem nungi asayaogo, kong Mumbai Indians aser Joburg Super Kings densema lir.

Shepherd-i T20 nung tang tashi nung ball tajungtiba anobaji run 13 agütsür wicket 4 agiba asütsü. Pa ya ball kanga kara aonba atema ajaki jangja lir, saka pai ano asaya tatemlen batting-a kanga junga menteter aser pa indang international average 26 dak tema aser strike rate 139 lir.

Pa taoba mapang MI New York nungi 2024 küm pezüben asayaogo, kong pa indang club tasenba den Grand Prairie Stadium nung asayaba densema lir, anungji pa MLC cricket asayatsü atema renemer arutsü aser pai Unicorns' team tashi jangja lir. San Francisco puri season

tasenba atema Australia nunger asayar Cooper Connolly aser Xavier Bartlett na den New Zealand international wicketkeeper-batsman Tim Seifert nunger alizükba tawa sangdongba sülen tang Romario Shepherd anisemogo.

San Francisco Unicorns Head Coach, Shane Watson-i ashiba agi, "global T20 circuit nung Romario tenüng kanga tajung lir. Pai condition balala nung asayaba tajangshiba bena lir aser pa lenisüba nung bowler tem asayatetsü aser asaya tatemi batting-a junga mena asaya tembangtetsü tashi lir, anungji pa taküm Unicorns atema kanga tongtibang asütsü."

San Francisco Unicorns pur 2025 MLC season ya June 12 nü California nung Oakland Coliseum nung taoba küm champions, Washington Freedom den asaya-a tenzüksü. Iba sülen parnok kasa tesem nung ano LA Knight Riders den June 14 aser MI New York den June 15 nü asayatsü. Iba sülen parnok Texas nung Grand Prairie Stadium nung oa asayatsü.

BILEMDANGANG

"Teprangshiba ajakjibo hon masü."